

superioribus forte editionibus Drefigianis vterentur: qui, et tirones, quam utile sit, si eadem exempla sequantur in legendis et enarrandis scriptoribus antiquis, expertus scio. Deinde excerpſi lectiones varias, cum e Codicibus calamo scriptis, quos ante laudavi, tum ex editis libris, etiam ex Corpore Paroemiarum Apostolii ²⁷, vt appareret, vnde lectio textus quaeque venisset: ostendique fere, quid mihi de quaque videretur. Multas praeterea virorum doctorum coniecturas collegi, et sententiam de iis modeste, et fere ita, dixi, vt lectionem vulgatam non sollicitandam esse docerem. Sed quemadmodum haec, magistrorum caussa, adiecta sunt: ita, vt tironum, vel imbecillitati, vel inopiae, consuleretur, confeci Indicem, in quo, non solum ea essent expedita, in quibus haerere imperiti possent, sed omnia etiam vocabula, omnes formulae, continerentur, vt omnes, etiam ignarissimi Graecarum litterarum, possent libellum, sine maiorum Lexicorum ope, legere. Pertinet autem Index ille tantum ad Capita quadraginta et sex priora. reliqua enim cum Galeo, et Isaaco Casaubono ²⁸, putabamus ab alio potius quouis, quam a Palaephato, profecta esse.

Neque vero dubito, quin tu sis, Frater carissime, operam hanc et laborem meum tua sententia vltro probaturus, non modo propterea, quia delectaris hoc litterarum genere, quum scias, viam muniri aditumque ad arcem verae doctrinae scientia Graeci sermonis, sed etiam ea de caussa, quoniam volui hunc libellum extare monumentum, quo memoria pietatis nostrae amorisque fraterni posteris quoque proderetur. Ego enim nunquam desistam te amare ac colere, quoad viuam, deumque rogare, vt te maximis omnis generis bonis commodisque cumulet atque adaugeat, vitaque vti quam longissima iubeat. Vale, venerandumque Parentem nostrum verbis meis etiam atque etiam saluta. Scripsi Lipsiae Kalendis Sextilibus A. C. CIO IO CCLX

L. B

27. Vid. Andreae Schotti Prouerbiis p. 172.
epistola Graeca ad Pe. Pantinum, praemissa Diogeniani

28. Vid. fab. 47. not. *